

“আনুকূল্য সঙ্কল্পঃ প্রাতিকূল্যবিবর্জনম্ ।

রক্ষিত্বীতি বিশ্বাসো গোপ্তৃত্বে বরণং তথা ॥”

আত্মনিষ্কেপকার্পণ্যে-ষড়বিধা শরণাগতিঃ ।

এই ছয়টি লক্ষণের ভিতরে গোপ্তৃত্ব বরণ অর্থাৎ শ্রীভগবানকে রক্ষকরূপে বরণ করিয়া লওয়া অর্থাৎ তিনিই আমাকে রক্ষা করিবেন— এই প্রকার নির্ভরতাটি শরণাগতির অঙ্গী, আর পাঁচটি অঙ্গ । শরণাগতি শব্দের সহিত গোপ্তৃত্ব বরণের একার্থতা আছে বলিয়া অঙ্গ, আর অন্য পাঁচটি তাহার পরিকর বলিয়া অঙ্গস্থানীয় । আনুকূল্যের গ্রহণ অর্থাৎ যাহা যাহা করিলে শ্রীভগবান সন্তুষ্ট হয়েন, কায়বাক্যমনে তাহা অনুষ্ঠান করা । অথবা শরণাগত ভাবের যাহা যাহা প্রতিকূল, তাহা তাহা কায়বাক্যমনে পরিত্যাগ করা । ‘রক্ষিত্বীতি বিশ্বাসো’ অর্থাৎ তিনিই আমাকে রক্ষা করিবেন—এইপ্রকার দৃঢ় বিশ্বাস “ক্ষেমং বিধাস্তি স নো ভগবাংস্ত্রধীশঃ” সেই নিষ্ঠুর মায়া নিয়ন্তা ভগবান্, আমার মঙ্গলবিধান করিবেন ইত্যাদি প্রকার দৃঢ় বিশ্বাস । আত্মনিষ্কেপ অর্থাৎ শ্রীভগবানে আত্মসমর্পণ, তাহার প্রকারটি গোঁতমীয় তন্ত্রে কথিত—“কেনাপি দেবেন হৃদি স্থিতেন যথা নিযুক্তোহস্মি তথা করোমি” অর্থাৎ আমার হৃদয়স্থিত কোনও দেব কর্তৃক যেমন নিযুক্ত হইতেছি, তেমনই কার্য্য করিতেছি ; এবিষয়ে আমার কোনও স্বাতন্ত্র্য নাই—ইত্যাদি প্রকার ভাবনার নাম আত্মনিষ্কেপ বা আত্মসমর্পণ । শ্রীপদ্মপুরাণের উত্তর খণ্ডে অষ্টাঙ্কর মন্ত্রের নমস্ শব্দ ব্যাখ্যায় যেমন উল্লেখ করা আছে, তাহাও পূর্বোক্ত প্রকার—

অহঙ্কৃতির্মকারঃ স্তান্কারস্তন্নিষেধকঃ ।

তস্মাত্তু নমসা ক্ষেত্রিস্বাতন্ত্র্যং প্রতিষিধ্যতে ॥

ভগবৎপরতস্ত্রোহসৌ তদায়ত্তাত্মজীবনঃ ।

তস্মাৎ স্বসামর্থ্যবিধিং ত্যজেৎ সর্বমশেষতঃ ॥”

নমস্ শব্দের “ম”কারের অর্থ অহঙ্কার, ‘ন’কারের অর্থ তাহার নিষেধ অর্থাৎ অহঙ্কারশূন্যতা ; অতএব ‘নমস্’ শব্দের দ্বারা জীবের স্বাতন্ত্র্য নিষেধ করা হইয়াছে । জীব সততই পরতন্ত্র । জীবের জীবন সর্বদাই ভগবদাধীন, অতএব অশেষ প্রকারে নিজের সর্ব সামর্থ্যবিধি ত্যাগ করিবে । নিজের কোনও প্রকার কিছু করিবার ক্ষমতা আছে—ইহা কখনও ভাবিবে না । ভগবৎসামর্থ্যে জীবের কিছুই অলভ্য থাকে না । শ্রীভগবানেই নির্ভরতা রাখিয়া চলিবে এবং শ্রীভগবানের কৰ্ম্মই করিবে । অতএব, ব্রহ্মবৈবর্ত্তে উল্লেখ আছে—